

言經。豁然意解即得阿惟越致。

(四一) 昔佛涅槃後百年。有王名阿育。大橋奢作殿舍縱廣十里。皆召諸小國畫師。畫師至各隨意畫作種種形像。罽賓北有一小國最遠。送一畫師後到。觀壁上屋表裏盡畫遍。唯有門頰邊五尺未畫。復至仰觀視諸物不知復作何物。自念我始來時過一小城。城邊有池。池有蓮華。見有一女端正姝好有相可中天下母。思惟已便畫作城池蓮華及女像訖。王至殿未入。便見此畫。問誰畫此耶。曰後來畫師。即問汝見形作也虛作也。曰見而非虛。王問汝為如形像作也為使好乎。曰不使好如其形耳。乃相知此女中天下母。便遣使者索娉為皇后。使者受命逕往其國。見女父母謂言。王索賢女為皇后。女父曰。嫁當奈何。便謂詣女夫家語。王使我索此女。道遠三年乃到。云卿已取王者至

尊。卿不宜惜也。當時與王。此夫是優婆塞。自思念人以財色危身。若不與者或能治人。便以婦與使者。去還到白王。王見大歡喜。即拜為皇后。得好華便悲啼。王問何故啼。后曰王赦我罪當說耳。王曰為說。后曰。此正似我前夫香。以故啼耳。王恚曰。汝為天下之母。故復念貧賤。汝是老嫗當應治之。旨遣使者往錄其故夫知為香不。若不香者故當治之。使者往問其家人。家人曰。此賢者失婦已。便報父母。王行作沙門得阿羅漢道。使者詣佛國中語言。王欲見供養道人。道人曰。我亦無所有。復見我為。使白言。王欲供養道人。道人隨使去到白王。王見道人。道人身香甚於蓮華。王曰。此人以香塗身。但作熱湯浴之。香又更甚。復以繒其身。其身香轉倍。王乃信之。問道人何緣得香乃爾。願見告示。道人語王。吾前世時為

婆羅門。行遙見人說經。我又手歡喜一心稱讚菩薩。兼以少香燒以供養。故令得福遂至道果。

(四二) 昔有父子二人共居。入山斫林。泉水有黃金。子便歸求父索分。言我不用餘物。物盡與父。惟與我車牛一具米二斛荻斫各一枚。父不聽之。數諫不止。父便與之言。汝莫復來歸。子便入山掘泉水中金。日日終不能得。父便共相將往視之。觀如是金。仰視山頭邊有金若山。影現水中。便上山以大木幢墮金於地。父語兒。求之法當云何。但掘水。何時當得。子不曉求金者。唯人不持五戒。但逐聽色聲。人身豈復可還得也。父者。唯如點之求金者。觀如本末時。持佛五戒加行十善生天。人身世世不失。後得佛道果。

(四三) 昔天帝釋。與第七梵天親善。時梵天下至忉利天上共戲。釋愁不樂。梵天問釋。何以

不樂。釋曰。卿見我天上人轉希不。下方人無復作善者。皆入惡道中無復生上者。天人下生人間轉復不還。我故愁耳。梵天語釋。卿便死化。作一師子極令威勢。我當化作婆羅門。共下到閻浮提。教授天下使為善。為善死皆生天。便各隨所化下到一國。師子在城門中言。我欲得人噉。國人見之無不惶怖。叩頭求哀終不肯去。化婆羅門語國人言。此師子惡與罪人應死者三十人。自當去也。王便出獄囚應死者三十人與師子。師子得人驅著前去到深山中。未噉之頃化天語諸人。卿等能持五戒念十善道。身口意相應者此師子便不噉人。諸人言。我等當死。此何足言能持耳。便從化人受戒。師子便不噉。師子言置令去。雖爾我知汝心。若不持佛五戒者。我故當噉汝。爾三十人還國。國人見皆驚。問曰。卿那得還耶。答曰有